

Stucca catalana u profezia?

Publicaziun nova davart il parlament europeic

DA GUIU SOBIELA-CAANITZ

■ **Tgi che s'interessa per il sport da prestaziun chapescha il pled englais «ranking». El è simplamain la furma substantivada dal verb «to rank»; lez munta «ordinar», «classar», e «ranking» pon ins translatar cun il substantiv «classament». Ordinar pon ins tenor bleras sorts prestaziuns; il pled «ranking» vegn il pli savens duvrà en connex cun umans.** Il parlament europeic (PE) dumbra 751 commembras e commembers, numnads per englais «Members of the European Parliament» (MEP) ed elegids l'onn passà dals pievels dals 28 stadis da l'Uniun europeica (UE). Sur il link www.MEPRanking.eu è cumparà in document online intitulà: «MEP Ranking.EU» nua che lezzas 751 persunalitads èn classadas segund differentas opticas. Nus cliccain il segund dals sis criteris proponids: Il stadi («MEP by state»). Sin il monitor stat uss ina skizza da l'Europa cun ils cunfins da mintga stadi. Remartgabla sin la skizza è la precisziun da las rivas maritimas.

Infurmaziuns davart preschent e futur

La Malta è in punct; ins sto mo cliccar sin lez per survegnir in'emprima carta d'identità: I vegn or ina fanestrina cun la bandiera maltaisa, il num «Malta» e la cifra da populaziun: «0.4M people» (400 000 olmas). Cliccond sin l'insla da Lesvos en la Mar Egeica, survegna la bandiera greca, il num englais ed il num grec dal pajais e sia populaziun: «11.2M people» (11,2 milliuns olmas). In clic sin la Sardegna, la Corsica e l'insla da Gotland dattan las infurmaziuns correspondentas per Italia, Frantscha e Svezia. Ussa clicca sin l'insla da Mallorca; la fanestrina tuna: «Spain (España) 40M people.» Curius. Mo 40 milliuns? Nà

cun il «Calendario Atlante De Agostini 2015»! Là (p. 994) dumbra la Spagna tuttina 46 559 738 olmas. Tge manca? Il corpus delicti è in cunfin da stadi «pirat» u «selvadi» sin la carta, il qual correspunda a quel che separa la Catalogna da l'Aragón e da la «Comunitat valenciana» aifer la Spagna. Cliccond sin la Catalogna, survegna in'atgna fanestrina cun la bandiera catalana da «quatre barres» (quatter strivlas cotschnas sin champ mellen) ed ils plets: «Catalonia (Catalunya) 7M people.» Tenor lez «Calendario Atlante» dumbra la Catalunya en vardad 7 480 921 olmas (p. 993). La chasa editura da «MEP Ranking.EU» ha simplamain anticipà la victoria da las partidas separatistas tar l'elecziun dal parlament da la Catalogna en settember 2015; quai fiss il fundament democratic da l'indipendenza catalana aifer la UE. Pussaveil, ma pli cumplitgà, fiss era che hackers hajan manipulà la carta silsuenter. L'editura ha en mintga cas resguardà detagls. Cliccond vinavant sin la fanestrina «Catalonia» chatt'ins per exempel ils nums da nov MEP, per gronda part nums tipicamain catalans: Santiago Fisas Ayxelà, Francesc Gambús, Ernest Maragall, Javier Nart, Josep-Maria Terricabras, Ramon Temosa Balcells euv. En las glistas dals MEP per ils ventgotg stadis commembers stattan nums enconuscents: Per la Germania il president dal PE Martin Schulz; per l'Italia l'antieriura ministra Cécile Kyenge, oriunda dal Congo; per la Frantscha las anteriuras ministras Michèle Alliot-Marie e Rachida Dati e l'activist «verd» José Bové; per l'Ungaria László Tökés, anteriur manader da la revoluziun rumena da 1989 a Timisoara/Temesvár; euv. «MEP Ranking.EU» è en mintga cas in document da valor per tgi che sa fatschenta cun il PE e sia commembranza dapi las elecziuns da l'onn passà.